

EUSKAL PRESOAK


Gabi Mouescaren askatasuna ospatuko dute lagunek datorren igandean Baionan

E. B. | BAIONA

Gabi Mouesca IK-ko preso ohiaren askatasuna ospatu eta preso ohia omenduko dute Errepresioaren Kontrako Batzordeak, Ahaideak elkarteak, Poloko lagunak taldeak eta Euskal Herriko giza eskubideen babes elkarteak. Besta hori datorren igandean arratsaldean iraganen da, 5etatik goiti, Baionako Polo auzoan, hots Mouescaren auzoan. Ekitaldi hartan hitzaldiak eta kantaldiak iraganen dira. Duela zenbait urte desagertu zen Guk taldea berriaz agertuko da taula gainean, karia horretara. Anje Duhaldek ere kantatuko du. Azkenik Piarres taldeak kontzertua eskainiko du.

Gabi Mouesca joan den ostiral goizean ateratu zen Arlesko presondegitik, hamazazpi urtez kartzelaz kartzela ibili ondoren. Egun hauek familiarekin pasatuko ditu. Bost urtez debekatu diote Ipar Euskal Herrian eta inguruko departamenduetan bizi-tzea, baita Parisaldean eta Korsikan ere. Lana, ordea, Parisen aurkitu da, elkartasun sailean.

TREBIÑO. Gaztela-Leongo Juntari arrazoa kendu dio ebazpenak



DAVID AGUILAR / EFE
Trebiño Burgos dela dioen Zaldiaran mendateko mugaria, pintatua.

Gaztela-Leongo Auzitegiak ontzat jo du euskarari buruz Trebiñok hartu ebazpena

Udaleko eta kaleko errotulazioa euskaraz egitea baimendu du

Erredakzioa | GASTEIZ

Trebiñoko Udalak euskararen erabilera bultzatzeko hartu zuen ebazpena legezkoa dela erabaki du Gaztela-Leongo Auzitegi Gorenak, eta arrazoa kendu dio Gaztela eta Leongo Juntari, Trebiñoko Udalaren ebazpenari helegitea aurkeztu baitzion.

Ebazpena maiatzaren 31n hartu zuen Auzitegi Gorenak, baina joan zen uztailaren 12an jakinarazi zioten Trebiñoko Udalari. 2.000. urteko urtarilean Estatuko helegitea aurkeztu zuen, eta ekainaren 6an Udalak hartu zituen erabakiak indargabetu zituen Gaztela-Leongo Auzitegiak. Trebiñoko Udalak onartu zuen kaleko eta Udaleko errotulazioa euskaraz eta gaztelaniaz egitea. Halaber, pleno aretoan ikurrina jartzea eta Eudelen sartzea deliberatu zuten Argantzunetik eta Trebiñok.

«Ebazpenak ez du esaten nork hitz egin behar duen euskaraz Trebiñon; bakarrik dio errotulazioa euskaraz ere jarriko dutela. Alde horretatik ikusita, ukalezina da helburu publikoa betetzen duela ebazpenak, guztiontzako ona bilatzen duela. Izan ere, gaur egun Trebiño Burgosen sartuta badago

JUAN CARLOS AGILLO

Trebiñoko alkatea

«Trebiñoko hizkuntza egoera aintzat hartu du Justizia Auzitegiak. Hori oso garrantzitsua da»

ere, ukalezina da lurralde euskaldun baten bihotzean sartuta dagoela». Hala dio Gaztela-Leongo Justizia Auzitegi Gorenak jakinarazi zuen epaiak.

Trebiñoko Udalak pozik

Trebiñoko Udaleko hautetsiak pozitu egin dira ebazpena ikusita. «Ebazpen honek agerian uzten du Udalak euskara erabil dezakeela zerbitzu publiko modura. Gainera, Trebiñoko errealtatea aintzat hartu du», adierazi du Juan Carlos Agillo Trebiñoko alkatea.

Auzitegiaren ebazpena «garrantzitsua» izango dela pentsatzen dute Trebiñoko agintariek. Izan ere, Estatutuak beste bi helegite aurkeztu zituen, euskararekin lotuak biak. Batek euskararen balio kulturala aldarrikatzen zuen, trebiñotar guztien «ondarea» delako. Bigarren ebazpen batek ahalbidetu zuen

euskaraz eta gaztelaniaz idatzitako pankarta bat Udaleko balkoian jartzea. Bi ebazpenei helegitea aurkeztu zuten Estatuak, eta orain Trebiñoko zinegotziek espero dute aldeko ebazpena izatea. «Eman duten ebazpenak balio behar du beste biak indargabetzeko», deklaratu dute.

Zehazgabetasun administratiboa

Euskarari buruzko ebazpena aldekoa izan bada ere, zehazgabetasun administratiboari dagokiona Estatuaren aldeko izan da. Auzitegi Gorenak balioagabe utzi du Udalak aldarrikatu zuen zehazgabetasun egoera. Akordio hori 1999ko arazoaren 26an hartu zuen Trebiñoko Udalak.

Trebiñoko alkateak ez dio bestelako garrantzirik eman Auzitegi Gorenaren ebazpen horri. «Agerikoa zen egoera administratibo-politikoa eremu juridikora eraman dute», adierazi du.

Halaber, jakinarazi du orduan salatu zuen egoera administratiboa ez dela ezer aldatu. Gaztela-Leongo eta Gernikako Estatutuek hala agertu arren, trebiñotarrek ezin izan dute orain arte nahi duten administrazioari lotu, Gaztela-Leonek ateak itxi dizkielako.

LAGUNAEAN

Eusko Jaurlaritzako sailburuek kargua hartuko dute gaur Ajuria Eneko jauregian

Eusko Jaurlaritzako sailburuak karguaz jabetuko dira gaur Ajuria Eneko jauregian egingo den ekitaldian. Eguerdian bilduko dira guztiak —uzten dutenak, segitzen dutenak eta lehen aldiz sailburu izango direnak—, eta kargua zintzo beteko dutela hitz emango dute. Gero, lehen Gobernu Kontseilua izango da eta famili argazkia egiteko aukera izango dute.

Mujika Garmendiak eta Arregi Erostarbek ez dute deklaratu beren kontrako epaiketan

Atzo hasi zen Entzutegi Nazionalean Pakito Mujika Garmendia eta Joseba Arregi Erostarberen kontrako epaiketa; eta bi akusatuek uko egin zioten deklaratzeari, epaitegia ezagutzen ez dutela argudiatuz. 1988an, Mardiren, Guardia Zibilaren Zuzendaritza Nagusiaren kontra atentatua egitea eta bi pertsona hiltzea leporatzen die fiskalak. Atzoko saioan Unai Parot lekuko bezala aritu zen, eta bi akusatuen kontra egindako deklarazio poliziala torturengatik egin zuela esan zuen.

Bermea errekurritu eta ETAkoak direla ukatu dute Gorostiagak eta Etxeberriak

Ez direla ETAkoak eta Ardatza elkarteko zuzendaritzan zeudenean ondasunen ezkutatzerik ez zutela egin esan zuten atzo, Entzutegi Nazionalean, Pablo Gorostiagak eta Joxean Etxeberriak. Baltasar Garzon epaileak bi delitu horiek leporatzen dizkie *Egin kasuarekin* lotuta; eta auzipetzearen berri ematea zen atzoko saioaren helburua. EHko legebiltzarkide ohiek, era berean, epaileak ezarritako 700 milioi pezeta-ko bermea errekurritu zuten.

Hernaniko EAko zinegotzi baten aurkako «mehatxuak» salatu dituzte

Gipuzkoako EAko lehendakari Iñaki Galdosek atzo salatu zuenez, asteburuan «mehatxuzko pintadak» azaldu dira Hernaniko kaleetan bertako zinegotzi Iñaki Barrioren kontra. Eak mozioa aurkeztuko du Udalean, gertatutakoa gaitzetsi eta elkartasuna azaltzeko.



Elorrioko Udala

EDIKTUA

2001eko uztailaren 12ko 419 Alkatezaren Erabaki bidez, honako Erabaki hau hartu da:

LEHENENGO.— Hasieraz onartzea «Labakua» izeneko Hiri Lurreko, 3.1 sektorea, Azterpen Zehatza, baina, behin betiko onartuko den agirian, arkitektoak egindako informeak diotenarekin bat, honako zuzenketa hauek egin beharko dira:

- Oinplanoko planoetan proposaturiko lerrokaduretan ez dago kotarik.
- Txostenean zehaztu behar da solairu desberdinetako banaketek ez dutela izaera arautzailea eta lerrokadurak derrigorrezko diren ala gehienekoak.

BIGARRENA.— Erabakia kale argipideketara ateratzea Bizkaiko Aldizkari Ofizialean eta lurraldean gehien irakurtzen den egunkarian. Azken argitalpena egiten denetik, interesatu eta ukitutako guztiek hamabost egun izango dituzte alegazio-idatzia aurkezteko. Eta espedienteaz aztertzea gura duenak Udaletxeko Hirigintza Sailean aurkituko du 09:00ak eta 14:00ak bitartean.

HIRUGARRENA.— Onarpen-erabakiaren jakinarazpena, baita ere, Zatikako Egitamuketa osatzen duten lurren jabeek eta zuzenean interesak dituztenei bialtzea, eta jakinaraztea, hamabost egun dituzte alegazioak tartekatzeke.

Elorrio, 2001eko uztailaren 12a.
ALKATEA.